



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 5

PV Sindhu BWF Council nung denogo

United Christian Forum-i Manipur CM dang teyari meshir



VOL. XXIII ISSUE NO. 194 (ADOK 194) DIMAPUR SANGTENNÜ (TUESDAY) RONGCHII (APRIL) 28, 2026 ₹ 5.00

AB PM-JAY kübok hemodialysis packages melenshiogo

Dimapur, April 27, 2026 (TYO): Ministry of Health and Family Welfare kübok National Health Authority (NHA) ajanga Ayushman Bharat Pradhan Mantri Jan Arogya Yojana (AB PM-JAY) kübok hemodialysis packages nung temelenshi kar süogo. Iba temelenshi nung pre-authorization shia dialysis cycles trok (6) akümer aser iba nung cycle shia bio-authentications ana (entry and exit) agütsür aser iba ajanga entry aser exit tsungda maximum permissible duration ji ghonda 4 dang akümer ta Nagaland Health Protection Society CEO

Thavaseelan K, IAS-i sangdong ka nung metetdaksüogo. "Iba temelenshi ya pusema nungiter aser iba ajanga maparen tashitsütsü melii aotsü saka mozükitem inyakyim nung kongshiba aser shirangertemi tetsükdaksü ajurutsü akok ta NHPS-i bilemtsür. Iba jagi NHA dangi shidi ka zülüogo saka ano telangzüba kecha mangu lir" ta Thavaseelan-isa ashi. Iba maparen nung Insurance Company ajanga systemic changes mesüra policy alterations kecha mesütetsü ta paisa shisem.

Special Secretary Dr. Yadav-i Nagaland semdang

Dimapur, April 27, 2026 (TYO): Department of Expenditure, Ministry of Finance, GoI Special Secretary Dr. Sajjan Singh Yadav, IAS-i April 27, 2026 nü Nagaland semdangi arua lir. Dr. Yadav-i anogo ananü Nagaland nung amungtsü aser Chümoukedima nung Special Assistance to States for Capital Investment (SASCI) scheme kübok inyakba mapatongtem reprangdangtsü. Tanü Additional Secretary, Finance & IDAN, Vineet Kumar, IAS aser tanga ketdangsurtemi Dimapur Airport nung Dr. Yadav pelaa agizüka liasü. Idak nung jagi pa Chümoukedima-i ao aser

Police Complex nung mapatong inyakbatem reprangdang. Chümoukedima nung SASCI scheme kübok Officers' Mess aser Football Stadium dena lir. Dr. Yadav-isa Unity Mall project aser Chümoukedima Police Station semdang. Idakji SASCI 2023-24 kübok barracks aser Type-III quarters yanglua lir. Iba mapang Finance Commissioner & Commissioner & Secretary to the Chief Minister, Nagaland, Kesonyu Yhome, IAS den tongti ketdangsurtemi Dr. Yadav meina senzü. Dr. Yadav-isa mapa inyakba tesemtem nung ketdangsurtem den ajurutepa sensaksem aser maparen inyakba reprangdanga liasü.

Gyan Bharatam Mission kübok state-wide manuscript survey tenzükogo

Dimapur, April 27, 2026 (TYO): Department of Art & Culture, Nagaland-i Gyan Bharatam Mission kübok state-wide manuscript survey ka tenzükogo. Gyan Bharatam Mission ya Ministry of Culture, Government of India ajanga inyaker. Gyan Bharatam Mission ajanga linük ajungalen manuscripts aser tongtipang otsütem jangjatsü, kuli akümtsü aser national database ka renemtsü nükjidong lir. Iba Mission ajanga manuscripts aser records tongtipang aika rejutem, religious centres, community repositories aser nijatem ket nung lir ta meteta lir. Nagaland nunga kuli bendena ayuba inyakyim khenyong balaka, kechiyong state nung putiotsü shisatsü kulitem rizünga ayuba rejutem

nung masü tangalen ang bendena lir. Ibala record ya church archives, missionary records, village institutions, early translations, customary records aser private family collections nunga yua lir. Anungji Gyan Bharatam Mission ajanga item record jangjatsü aser national digital platform ka ajanga bendena ayutsü. Department of Art & Culture-i rejutem, lokti aser kijatem dang manuscripts mesüra record tejentem lemsateptsü mepishia metetdaksüogo. Iba Mission nung public-i shilem agitsüba kanga tongtipang aser Nagaland indang documentary heritage senti ya jungjunga jangjar wazüka ayutsüba nung yariteptsü ayongzüker ta Department-isa metetdaksüogo.

NPF lanurtem dang chichiba lennirtem akümtsü ayongzük



Kohima, April 27, 2026 (TYO): NPF Central Youth Wing-i Laishiba tangatetba nungi lanurtem asoshi sentong tajung ka ayongzüka agiogo. Iba sentong ya Hombarnü Central Headquarters, Kohima nung ayongzük aser telongjem, temulungtetba aser mangdang akaba lennirtem asütsü indang ayongzüka liasü. Iba sentong nung Rev. Apostle Luoliehu Yimsung-i "Biblical foundation for Ethical Political Leadership" onük jembia liasü. Nagaland nungi missionary Rev. Yimsung-i 1986 nungi Singapore, Australia aser Oceania nung inyaka arur. "Chichiba lenisüba ya tenüng aser jenjang dak alia oa lir aser chichiba lenisüba nung tasütait, tebilemstü khuret aser tarutsü asoshi mangdang tejangja nungdaker" ta pai ashi. Lennir tajungtemi tangar ajungmesotsüla, nübortem den

teti sendaktepa alitsüla aser külemi temelenshi tajung bener arutsüla. Lenisüba ya kija mapa masü saka telok mapa ka lir anungji teloktem sasep nung telongjem, amalitep aser kati ka pusemteptsüla ta Rev. Yimsung-isa ashi. Külem züngsemtem tashi itdaksüba, inyaktetba atema tenüngsangtepa aser aintsü atema maongkatem agütsütepa ajanga telok tashi aiter aser mapa inyakteter ta paisa ashi. Paisa lennirtem dang terenlok aser temelenshi atema meranga inyaksü ayongzük. "Mapa inyaksü mulungba aser nendaka inyaksüpurtemi teti atema temelenshi bener aruteter" ta Rev. Yimsung-isa metetdaksü. Paisa lennirtem dang akangakanga noktaksü, ajemalutsü aser peii inyakba asoshi tenüng agitsü ayongzük. "Tarutsü political leadership anitettsü asoshi kanga

nungdaker. Lanur lennirtemi taintem dang nungi shisatsü meshitsüla, alima den putepa putu melenshiba den liromedemtsüla aser digital platforms amshitsüla" ta Senior Vice President Nüzota Swüro-isa ashi. "Chichiba lenisüba ya tashi mesüra jenjang masü saka tenzükba, bendanga agütsüba aser ochishia noktakba nung tera yanga lir" ta MLA & Central Youth Wing Legislature in-charge Imkongmar-isa ashi. Pai lanur lennirtem dang nübortem den tesentaktep tajung yur inyaksangshitsü, parnok tebilemstülem angatsü aser tebilemstü khuret bena len anitsü ayongzük. Sentong nung CYW general secretary Aienla Longchar menden liasü, NPF Central Youth Wing President Süpoyi Vezhü-i tesentepertem pelaa agizük aser CYW working president Lhouvi Punyü-i anküp tepela o jembi.

Nagaland & NE nung tsüngsang majungtsü

Dimapur, April 27, 2026 (TYO): Nagaland nung taruba anogo pezü tashi tsüngsang majungtsü aser April 29 nü district aika nung tzunglu arutsü aser yipru aittsü ta Nagaland State Disaster Management Authority (NSDMA)-i metetdaksüogo. April 28 nungi district teimba ka nung tzunglu aru tenzüktsü aser tesem kar nungbo tsüngmok

atentsü aser tsüngi aitsü ta NSDMA-i ashi. Peren aser Kohima nung mopung 30-40 kmph tesashi ona tzunglu tashii arutsü akok ta parnokisa ashi. Külen, India Meteorological Department (IMD)-ia Northeast nung taruba anogo pungu tashi tzunglu arutsü aser yipru aittsü osang metetdaksüogo.

April 27 nungi 30 tashi Assam aser Meghalaya aser April 30 nungi May 2 tashi Arunachal Pradesh nung tzunglu kanga arutsü ta IMD-i ashi. Külen, Nagaland, Manipur, Mizoram, aser Tripura nung May 1 tashi tzunglu arutsü aser state aika nung 70 kmph tashi mopung tesashi aontsü akok ta parnokisa metetdaksüogo.

NESO-i Manipur nung yimjung bener arutsü akhanger

Guwahati, April 27, 2026 (Agencies): North East Students' Organisation (NESO)-i Manipur nung tensa süngjemdaksütsü atema telemetba takang aika maparen inyaksü ayongzükogo. Manipur nung nisung taküm samaba aser loktiliba nung teputep mali akümba atema süoki ia bilemer ta NESO-i ashi. "Manipur nung ozüng alema inyaksangshi manenba ya humanitarian issue tulu ka kümogo aser tai maketba civilian temi takoksa ajurur. Kecha masüba civilian anema mapa inyakba ya meimchir akhüm, security aser yimjung nung alitsü temeten anema lir" ta NESO chairman SB Jyrwa-isa ashi. Mepetmesü ajanga kibong aser loktitem asoshi masadangtetba timtem adokdaksüogo. Parnok temulung shirangteper, tetsübu nung alir aser kechi tia ajurutsü memetet timtemdaksür. Iba mepetmesü ajanga tasüba ajuruba kibongtem den asükhu lemsateper aser timtem agi kongshi alir ajak den külemi noktaker ta NESO Chairman-i metetdaksü. "Manipur nung alirtemi timtem ajuruba ya Northeast ajunga indang külem timtem lir" ta Jyrwa-isa shisem. State aser centre sorkartemi tiyongtsü nung mapa meinyaktetba aser tensa süngjema mekümdaksüba atema kanga süoki ia bilemer ta paisa ashi. Tensa tamajungba kuma meyoktsü aser takoksa ajurur nem temeten agaütsütsü atema sorkari mapa inyaksüla. Tesempatsü mapa inyaktertem maittsü jangjatsüla aser parnok ozüng merenshitsüla ta Jyrwa-isa takhangba agütsü. NESO-isa lokti ajak aser sendaktepa alirtem dang aremzükteptsü aser ozüng alema inyaksü melena olemteptsü mepishia metetdaksüogo. NESO-i yimjung yanglutsü asoshi tenangzükba agia lir aser tesüiba nunga yimjung yanglua aruogo. Manipur nung yimjung bener arutsüba ya northeast atema kanga nungdak aser asenok ajak indang külem teinyaksü lir ta Jyrwa-isa ashi.

National Health Mission-i 'ASHA Connect' app sayaogo



National Health Mission-i 'ASHA Connect' app sayaba tangokba noksa nung angur.

Dimapur, Rongchii/April 27 (TYO): Department of Health & Family Welfare, Nagaland kübok National Health Mission (NHM) ajanga April 24, 2026 nü IDSP Conference Hall, Directorate of Health & Family Welfare, Kohima nung 'ASHA Connect' App sayaogo.

ASHA Connect ya web-based application ka lir, koba Accredited Social Health Activists (ASHAs) atema senotsü teyari agütsüba tali ochishia aser tajungba nung

amshitsü aser state tesem ajunga nung performance monitoring atema yangluba lir.

ASHA Connect amshiba ajanga incentive agütsüba nung menuba ajemtsü, senotsü amshiba nung tali ochi ashitsü, ASHA inakyim tajungba nung mittsü aser real time data shidak agütsüba ajanga tesem ajungalen mapa tali shidak inyaktsü.

Iba sentong nung Dr. Keveduyi Theyo, Mission Director, NHM menden liasü

aser Dr. Thomas Keppen, Deputy Director, NHM ajanga app indang tongmelang agi rasaa ashi.

ASHA Connect App ya Anoop Khinchi, IAS, Commissioner & Secretary, Health & Family Welfare Department ajanga semzüksü aser Dr. Mereninla Senlem, Principal Director, Directorate of Health & Family Welfare, Nagaland, Kohima ajanga melepzüng o jembia sentong ya tembang.

Ashipo Society-i May 1 nü Chuchuyimlang nung 3rd Moatsü Mung Concert ayonger



Ashipo Society züngsem kar Hotel Magnus nung osangbener senden akaba mapang tangokba noksa nung angur. Mokokchung, 27th April, 2026

Mokokchung, 27th April (TYO): Chuchuyimlang nung aliba Ashipo Society-i 3 buba Moatsü mung kenten sentong ka taruba ita May 1, 2026 aonung 6:00 ako nungi tenzük Anü Mai Amphitheatre, Chuchuyimlang yimdak ayongzüka lir, ta tanü Ashipo teloki Hotel Magnus, Mokokchung nung osangbenertem den jembidang metetdaksü.

Iba kentenmenü sentong nung Dimapur Urban Council Chairman Federation (DUCCF) Tir, Zasivikho Zakiesato tetushi tesemdanger asütsü jaoka lir. Jangratemtsü kaji iba aonung Guest Artist-ji Nagaland nungi nüngtugu ken mejemer aser atener Keneisenuo Sorhie aser Momo Girl atenla Aseno Metha nadi tongti shilem agütsü. Iba den ano Chuchuyimlang yim aser temeket yimtsüng balala nungi kentener tajung kar jaoka lir, ta parnokisa metetdaksü.

Iba sentong ya tongtibangsa lanur kentenmenü jangrartem anitena parnok nem sabang lapoktsütsü aser parnok sempet

arangshia ajungkettsütsü nükjidong yur taküm agi joko kümsembuba ayonga arur. Ano iba sentong ajanga senso nübur tsüngta kadi ka metettepba den tesentaktep tali akangshitsü aser iba ajanga telungjem adokdaksütsü taginüba nung ibai ayonga akar, ta Ashipo Society mendenbuba Imlinok-i metetdaksü.

Sobaliba, yimsüyimbong aser pei tetsü oshi wazüka ayutsü nükjidong yur Ashipo Society-isa online ajanga Ao oshi nung ken tetoktepba ka taküm agi kümsembuba "Ao Folk/Folk Fusion Song" ta sür ayongzüka arur. Taküma tang tashi nung tetokteper parnok 10 arua lir. Iba nung arishi küm tasazük kecha mali shilem agidaksü aser takok osangji April 30, 2026 nü sangdongtsü. Iba tetoktepba nung tajungtiba ka shima sen 10,000/- agi senpettsütsü aser Moatsü Mung Concert nunga shilem agütsü maangka agütsütsü, ta paisa shisem.

Iba sentong ya tanü tashibo sorkar nungi teyari kecha

medeni senso nüburtem tenlatepa ayonga arur, saka takümbo osang tajung kaji Art & Culture Department nungi teyari kar angutsü jembishinüdar, ta pai ashi. Tourism department mesüra Task Force for Music and Arts (TaFMA) amala mesüra telok kari danga teyari agütetsü nungbo iba sentong ya tajungba/tuluba aser metitemi ayonga aotsüsa lenmang satema lir, ta paisa tebilemba ka lemsatpep.

Ashipo Society ya 2011 nung tentet aser iba telok nung züngsemtemji lanur tesa parnok 7 lir. Par telok tenzüküer külen nungi parnoki shisaluruin (education), saisabong, sobaliba kentenmenü tsütsü aser ano lokti mapa balala nung temulung agüja inyaka arur. Par telok ya society register asütsü merangdar ta parnokisa metetdaksü.

Moatsü Mung Concert reprangtsü atema ticket alitsü menüngdaker, anungji, tejangrar ajak iba kenten benjongi pelashishia jaoker, ta Ashipo telokisa ayongzüka metetdaksü.

MDRC-i Science nung küm pezü UG programme tasen agütsür

Dimapur, Rongchii/April 27 (TYO): State nung Central University ka dang aliba, Nagaland University ajanga Multi-Disciplinary Research Centre (MDRC)-i aruya aliba academic year asoshi Science nung Four-Year Undergraduate Programme agütsüba nung admission agütsü atema applications meshir.

MDRC nungya Physics, Chemistry, Mathematics, Zoology, Botany aser Ability Enhancement Courses nung Core courses agütsür aser iba den Value Added Courses tem agütsür.

Item courses atema admission ya April 27, 2026 nü lapoker, kong 'NEP 2020 kübok flexible exit options, research track and multidisciplinary learning' lir aser Physics, Chemistry, Math, Zoology, Botany & Ability Enhancement Course nung Core courses agütsür.

MDRC yagi Flexible Choice-Based Credit System (FCBS) amshir aser yangji multiple entry aser multiple exit options lir. Kaketshir temi küm ka sülen Certificate ngutetsü, küm ana sülen Diploma ka angutsü, küm asem sülen Bachelor's Degree aser küm pezü sülen Bachelor's Degree with Research angutsü. Küm pezü research degree ya agiba ajanga PhD programmes atema direct admission angutsü.

Iba dak sendakba nung osang tali metetner temi mdr@nagalanduniversity.ac.in dangi zülutsü akok. Application ya April 27, 2026 nü nungi agizütsü aser May 18, 2026 tashi alitsü.

Jangra alirtemi

www.admission.nagalanduniversity.ac.in/ajanga apply sütettsü.

National Education Policy (NEP) 2020 den lirumedema multidisciplinary aser research-oriented undergraduate education aginüba kaketshir tem asoshi admission lapoka lir.

Iba programme ya Lumami campus nung agütsür.

Vice-Chancellor, Nagaland University, Prof. Jagadish Kumar Patnaik-i India tesem ajunga nungi kaketshirtem Multi-Disciplinary Research Centre nung küm pezü undergraduate science programmes agütsü atema jaoka jembidang, "NEP 2020 indang mangdang den lirumedema item programmes yagi flexible exit options, dedicated research track aser multidisciplinary learning environment agütsür," ta ashi.

Tanü tensa den apet curriculum ya yanglua lir aser kasa mapang discipline balala nung angazükdaksü. Iba programme nungya employability enhancement courses, Ability Enhancement Courses aser Value-Added Courses agütsür.

MDRC kübok B.Sc. in Physics; B.Sc. in Chemistry; B.Sc. in Mathematics; B.Sc. in Zoology; B.Sc. in Botany nung programme shia menden 10 atema applications meshir.

Class 12 nung marks shilem 50 mesüra tali mesüra CBSE, ICSE, AHSEC, BSEB mesüra State mesüra National Board ajanga recognised süa aliba board nung iba den sako marks ngua alir temi apply sütettsü. Class 12 tatidang agütsür temia apply sütettsü.

NHRC India-i Short Film Competition-2026 atema metetdaksür

Dimapur, Rongchii/April 27 (TYO): Human rights dak sendakba nung awareness agütsütsü aser yimya tasen amshia iba indang sangdongtsü nükjidong nung National Human Rights Commission (NHRC), India ajanga Short Film Competition-2026 nung entries meshir.

Commission ajanga sangdong ka agütsüba nung, iba tetoktepba ya India senso ajunga asoshi lapoka lir. Short films ya Hindi, English mesüra Indian oshi mashi nung English subtitles keter agütsütsü akok aser item films ya minute 3 nungi 10 tsüngta asütsüla.

Short films indang omen ya socio-economic, cultural aser political rights balala nung amendaker alitsüla. Film ya documentary, shidakba otsü drama ama yangluba mesüra fiction tem animation densema technical format mashi nung yanglutsü akok aser 'right to life, liberty, equality and dignity and covering issues specific to bonded and child labour, women and children's rights, rights and challenges of elderly persons, rights of persons with disability, manual scavenging, right to healthcare, issues of fundamental freedoms, human trafficking, domestic violence, human rights violation due to police atrocities, custodial violence and torture, socio-economic disparities, rights of Nomadic and Denotified Tribes, prison reforms, right to education, right to clean environment including environmental hazards impacting life on planet earth, right to work, right to equality before law, right to food and nutritional security, rights of LGBTQI+, human rights violations due to displacement on account of, either man-made or natural calamity, celebrating human rights and values in Indian diversity, development

initiatives improving life and living standards, etc' tem indang yanglutsü akok.

Iba competition nung mezüng jenjang angur nem senpet sen 1 lakh, tanabuba jenjang angur nem senpet sen 1.5 lakh aser tasembuba jenjang angur nem senpet sen 1 lakh agütsütsü.

Iba den film tajungtem rongnungi pezüibuba nem 'Certificate of Special Mention' den senpet sen 50,000 agütsütsü.

Shilem agütsü atema entry fee mali. Applicant shia-i film ka-ka dang agütsütsü aser taoba mapang NHRC nem agütsür aliba films tem magizüksü.

Entries ya fiction, documentary mesüra animation nung asütsü akok aser MP4 format (Full HD preferred) nung maximum filesize 2 GB asütsüla.

Applicants temi sorkari agütsüba ID proof tejangja ka agütsütsüla aser film nung njingja aser credits alitsüla.

Entries mabensa mesüra prescribed guidelines sülen manidakba magizüksü. Tai aputsüla mesüra mangsa content tem magizüksü. Tetendanger tem telemtetba ya tatem asütsü. NHRC-i agüja aliba aser award agüja aliba films tem awareness atema amshitsü akok.

Shimtetba participants tem New Delhi nung award ceremony nung adentsü jaoktsü aser senzüsempogba indang agütsütsü.

Entries ya online ajanga Google Drive nung film ya upload sür agütsütsüla aser link ya nhrcshortfilm@gmail.com ajanga lemsateptsü.

Entries agütsütsü atema June 30, 2026 ya tatem alitsü. Iba dak sendakba osang tejangja, application forms tem https://nhrc.nic.in or https://nhrc.nic.in/flipbook/files/255 nung angutsü.



April 27, 2026 nü New Delhi nung Ato kilonser Narendra Modi aser NITI Aayog züngsem, Gobardhan Das na senden amendang tangokba noksa nung angur.

Bengal nung election sülen sepaitem anogo 60 alitsü: Amit Shah

New Delhi, Rongchii/April 27 (Agencies): Hombarnü Union Home Minister, Amit Shah-i, West Bengal nung assembly election tembangba sülen-a central sepaitem anogo 60 nü tashi state nungi mainshitsü, ta metetdaksü.

Amit Shah-isa Bengal nung voters dang kecha tetsübu makai vote agüjang, ta ashi.

April 23 nü West Bengal nung assembly election mezüngbuba shilem agiogo aser tanabuba shilemji April 29 nü agiba sülen May 4 nü vote azüngtsü.

Behala nung Behala Purba aser Behala Paschim menden na nungi BJP candidate ana atema nüboyimtsüba sentong ka nung jembidang Shah-i, "Adianutem, April 24 nü polling booth-i oa vote agüjang, Didi'er (Mamata Banerjee) nisung tamajungertem tetsübu. Election Commission-i tesem ajaklen CAPF sepaitem yoka

lir. Yangi BJP sorkar arutsü, ajisüaka election tembangba sülen-a anogo 60 tashi central sepaitem yangi alitsü," ta ashi.

Shah-i, BJP-i takok ngura yimtenren dak sendakba nung rara aser ozüng alema arua aliba bendangertem anema inyaksü, ta metetdaksü.

Paisa, BJP-i Uniform Civil Code (UCC) benoktsü, ta metetdaksü.

"May 4 sülenbo tebur kati kinüngtsü aika agiba ya memelatsü," ta pai metetdaksü.

Chief Minister Mamata Banerjee aser lai aniba party aija Shah-i, Trinamool Congress (TMC)-i vote bank atema ozüng alema arua alirtem kümzüker, ta ashi.

"Bendangertem ya meindoktsüla ta onoki jembidang Didi (Mamata) jashir. Lai SIR anemer. Electoral rolls nungi tenünga aika agienogo aser May 4 sülen bendanger ajak

maitsü jangjaba sülen Bengal nungi meindoktsü," ta Shah-i metetdaksü.

Chandannagar nunga lokti den jembidang Home Minister Shah-i, "Ni Chandannagar nung Didi (Mamata)'er nisung tamajungertem merener. April 29 nü voters amokmeren masütsüla. May 4 sülen BJP-i aibelenertem nem temerenshi agütsütsü aser langkoshishi alener ayutsü," ta metetdaksü.

Paisa, "Tang TMC sorkar yimsüsüba kübok sorkar indang social welfare programmes aika nung ochimashi tulu lir. BJP sorkari yimsüsüba tajung agütsütsü, tensa tajungba kümdaktsütsü aser "Sonar Bangla" yangertsü," ta metetdaksü.

Tang tashi nungbo election süngjema agidar, kechiyong rara tulu madok mesüra nisung asüba osang mali, ta paisa metetdaksü.

Maharashtra kübok Akola nung temperature 46.9-degree C tashi atu

New Delhi, April 27 (Agencies): India nung temperature teimtiba atubaji Maharashtra kübok Akola (46.9°C) liasü; iba dak alia Nagpur yimti aser Vidarbha region kübok tesem aika nung kanga tatsük liasü, ta Hombarnü MeT ktdangsertemi metetdaksü.

Mongolbar tashi nung Maharashtra kübok Vidarbha region tesem aika nung kanga tatsük asütsü aser maximum temperatures ji 46 degrees Celsius tashi atutsü aser tesem kar nungbo 47 degrees Celsius tashi atutsü, ta MeT-i metetdaksü.

"Amongnü Akola nung temperature 46.9 degrees Celsius tashi atu, aser ibaji India nung temperature teimtiba atuba lir. Amravati nunga 46.8 degrees Celsius tashi atu," ta Nagpur yimti nung amenoka aliba India Meteorological Department's Regional

Meteorological Centre (RMC)-i metetdaksü.

Wardha nung temperature 46.4 degrees Celsius, Yavatmal nung 46 degrees Celsius, Nagpur nung 45.4 degrees Celsius aser Chandrapur nung 45 degrees Celsius liasü.

Akola, Amravati, Wardha, Yavatmal, Chandrapur aser Nagpur nung kanga tatsük liasü aser district aika nung above-normal temperatures liasü, ta RMC scientist Dr Praveen Kumar-i osangbenertem nem metetdaksü.

IMD-i Akola, Amravati aser Wardha nung 'orange' alert metetdaksü aser Nagpur, Chandrapur aser Yavatmal nung 'yellow' alert metetdaksüogo.

Mongolbar tashi tesem aika nung tatsük asütsü, iba sülen 2-3 degree C ajema küma tzünglu aruba ajanga tali atsükba ya terabo süngjemtsü, ta IMD-i metetdaksü.



April 27, 2027 nü Nadia nung Santipur constituency nungi CPI (M) candidate, Soumen Mahato-i cycle nung mener nübo yima senzüba noksa nung angur. April 29 nü West Bengal nung assembly elections tanabuba shilem agitsü.

Odisha nung census duty inyaker tesayur ana tatsük agi asü

Bhubaneswar, April 27 (Agencies): Odisha state nung tesem balala nung census duty inyaker school tesayur ana tatsük agi süogo, ta Hombarnü ktdangsertemi metetdaksü.

Mayurbhanj aser Sundargarh district na nungbo temperature 37 degrees Celsius tongogo aser iba district ana nungji tesayur kaka asü.

Mayurbhanj district kübok Betanati nung aliba Baidyanath High School nung tesayur inyaker, Rajkapur Hembram, Baripada nung aliba hospital ka nung treatment tagidak mapang

Amongnü aonung süadokogo.

Pa census duty inyakba sülen kidangi shilangba mapang nung süchia aoba sülen medical facility kati anir oa liasü saka mekümsükteti asü.

Par kinüngertemi ashiba agi, pa temang mejungi dang alir anungji pa nem census duty telemzüksü ta mepishi, ajisüaka ktdangertemi pa nem duty lemzükja liasü.

Ano Sundargarh district nunga Jarada Government High School nung tesayur, Anurag Ekka Honibarnü census duty inyakba mapang nung shiranga

ait, aser kasa anogo nungjisa asü.

Pa shiranga Gurundia community health centre-i anir ao, iba sülen pa temang tamajungba küma district headquarters hospital-i anir ao saka mekümsükteti asü.

Joko India tesem aika nung kanga tsüka akümba agi state sorkari census mapa inyakerterem dang anüngdang 11:00 ako nungi nikongdang 3:00 ako tashi nungbo anü pua mapa meinyaksü, tzü peria ajemtsü aser Oral Rehydration Solution (ORS) ajemtsü tuyua lir.

AAP MP teneti BJP nung adenba Rajya Sabha Chairman-i agizük

New Delhi, April 27 (Agencies): Rajya Sabha Chairman, C.P. Radhakrishnan-i taoba mapang AAP MP 7-i party toktsür BJP nung adenba agizükogo.

MP teneti BJP nung adenba sülen tango Rajya Sabha nung BJP MP 113 kümogo.

MP tenetji Raghav Chadha, Ashok Mittal, Sandeep Pathak, Vikramjit Singh Sahney, Harbhajan Singh, Swati Maliwal aser Rajinder Gupta nung lir.

Rajya Sabha Chairman-i MP tenet agizükba sülen Union Minister Kiren Rijiju-i X ajanga iba osangji metetdakja, Ato kilonser Narendra Modi-i aniba teloktep nung parnok denogo, ta metetdaksüba den külemi opposition INDIA teloktep aitsü.

Iba sülen Rajya Sabha website nung MP tenetji BJP Parliamentary Party nung züngsemogo. MP tenet-i AAP toktsüba sülen tango Rajya Sabha nung AAP MP asem dang kümogo.

Ano külen Punjab nung Rajya Sabha MP tenet nungi parnok trokbo BJP MP lir. Tanüngba AAP MP kaji Balbir Singh Seechewal dang lir. Rajya Sabha nung AAP MP asemji Seechewal den Delhi nungi Sanjay Singh aser N.D. Gupta nung dang lir. Hokolbarnü AAPMP tenet jagi

Rajya Sabha Chairman dang parnok BJP MP tem ama agizükang, ta mepishiba ama Chairman-i agizükogo.

AAP-ibo, ibaji lintük temzüng alema lir, ta shia Chiarman dang MP tenetji anenjang ta temepishiba agüja lir.

AAP MP, Sanjay Singh-i, Rajya Sabha nung party MP tenet anendaktsütsü atema pai Rajya Sabha Chairman nem temepishiba shidi ka agütsüogo, ta metetdaksü.

Singh-isa, nüngdak dang süra pai ken o benoktsü, kechiyong party MP tem jagi anti-defection ozüng alema inyakogo, ta metetdaksü.

Singh-i, Uttarakhand aser Arunachal Pradesh dak sendakba ken otem densema Supreme Court-i agütsüba obendang aika ajanga item ama 'defections' ajanga MP nung anentsütsü akok ta shiogo, ta metetdaksü.



April 27, 2026 nü Bhopal nung BJP Legislative party senden nung Madhya Pradesh Chief Minister, Mohan Yadav-i jembidang tangokba noksa nung angur.

LAND FOR SALE

North : 107 fts
 South : 101 fts
 East : 106 fts
 West : 87 fts
 Location : AtIndisen Village
 Contact : 8798160994



TIR YIMYIM YIMOBILEM (EDITRIAL)

DIMAPUR TUESDAY, APRIL (RONGCHII) 28, 2026

Government school-tem ajungtsü

Nagaland nung Naga nungertem dang mezüng zülutsü aser azüngtsü sayuba kaketshisatsü ya, asenok kanga tia ajung, America nungertemi arua sayu. Ibayongji, asenok Roman (Latin) alphabet amshia zülur aser oshia pei tetsü oshi den külem külemi alima kintem oshi English angazüker. Aji oda, India dena British yimten talenba kübok alidang, Nagaland nungbo America nunger Missionary-temi Naga lima nung kaketreju lapoka Naga nungertem shisa tenük lapoktsü, anungji India telongjem kübok Nagaland-a state balaka asütsüsa yimten telemtetba agiba sülenbo, mapang tatsüka tsüngda nung yimtsüng ajak nung government primary school lapokyonga ao aser yimtsüngtem anasa town-tem nung Govt High School lapok. Item school-tem nungji azünger kaketshirtem pei pei kidang nungi anepdang yakta saker tzüda aotsü aser iba süleni aritepa chiyonger külen school-i aotsü aser school senshir külena chisüng tilala chiyongerbo kar süngbeni aotsü aser karbo alui aotsü aser aonung tesü adoka tsüraburi soruchiokba chiyonger khen lesson bushitsü aser tananüa kasa anogo sentongji aotsü ta azüng. Aji oda, iba mapangjibo tanü asüng amai, school senshir, tuition balaka agiba yimya mali asü aser school sodi mapang nunga ki aser alu mapa inyakba agi lesson bushitsü mapang mangu. Iba ama tia nungji 1980s tashika Nagaland nung government school nung azüngertem dang liasü aser item purtemji aika tajung kümer tanü yimten, arogo, lokti aser business watang balala nung nübertem asoshi temoatsü aser khunendong kümer lidagi. Iba mapang tashi nungbo tanurtem ajak kaketrejui oaka ki aser alu mapa nung tebilemtsü tulukabo mali asü, kechiyong tanurtemi akok tashi pei tsüraburtem mapa nung yaritep. Ajisüaka, meilongi Nagaland nung private school-tem lapoktsü tenzük aser item private school-tem dang English school ta aja, anungji item private school-tem nungbo English dak alaka pei tetsü oshi dena mejembidaktsü aser English jembirbo mapa kecha meinyak kazür ta bilem. Iba jagi nisungtem nem tai tangatetba ka agütsü, kechiyong English ashir dang lokti nunga temeteter ama züngshi aser pei tetsü oshi jembitsübaji kecha memeteter den kasa jenjang nung mezüngmeshia amshi. Aji oda, Private English school nung azüngertemji takar aser tulur chirnurtem aser government school nung azüngertemji tilar aser sensaker chirnurtem ta bilemtsüsa metetmeteta bendangadok. Ibayongji, private English school nung azünger tanurtem aika asüküma aküm aser aika English a junga mashi aser pei tetsü oshia junga mejembitet ta tagidak maka küma adok. Ano, private English school nung azünger aika English-bo ashi saka mapa inyakbo kecha mashi aser teinyaka meinyakner ta tagidak maka kümadokba purtem aika lir. Item denji 1980s tashi nung government school nung azünger medemdangra, nisung tajung aika government school nung züngtetertem asütsü. Ajisüaka, taoba küm 40 shi ka Nagaland nung metetmeteta Govt school-tem nung tazünger mali akümba angur. Ibaji tesayur majungba agi masü saka asenoki mangatetba ajanga government school nung azüngertemji tepetzük tia nung alir chirurtemang azünger amai taaktsüka kümdaktsü. Ano, aji dang masü saka yimten lenirtemia tesayurtem akümtsübu a amshitsü melen, election temer tesayurtem transfer yoka mezüngmeshitsü tenzük aser government school nung temulung magütsüi aküm, kechiyong item nungji pei chirnurtem mazüng. . Aji oda, oda-oda, Nagaland nung government school-tem ya kaketshisatsü sayudak aser angazükdak masü saka ita sen chia alitsü atema tesayur aser mapa inyaker tem shimba tesemtem amai ka dang School Education Department küma adok. Iba nükjidongji atongtsü atema, ano mapang kabo, tazünger mali ser nung yimtsüng ajak nung Govt High school lapoka toktsü, ibayongji Govt High school aika nung kaketshirtem dangbo tesayurtem teimba aküm aser class kar nungbo tazünger tejang kata mali asü. Iba timtem jagi tanü tashi Nagaland nung government school-tem kangshidagi. Ajisüaka, meilongi asüyonga teimlatsü kaji, Nagaland tesem aika nung government school-tem shia aruba angur aser taoba mapangtem nung amato taküm-a class 10 tatidang nung tematiba takok jenjang angur 20 rongnung kabo Govt.High School nungi liasü. Aji oda, tang tashia Nagaland nung college-bo government college-temsa tajungba lir, iba amaji küm ishika tsüngda government school-tema private school-tem dang nungi tajungba akümtsü imlar.

OLEMSABANG

NLTP ACT 1989 AJANGA NAGA KHRISTANTEM TELOK ANA LEMSAR OTIA RARATEPPER.

~ K. LIMA LONGKÜMER

(Yashi adok nungi...)

Iba NLTP ACT 1989 aser Dry State akümtsü ozüng ya sorkar-i public dangi abenba ozüng macü saka Naga nunger nüchipuri Naga nüpur daküm yi ajanga sümaba, temenen menatenba chiyongtsü tamajung acübayong Sorkar dangi benna iba ozüng ajanga Naga nunger ajak ajangzüktsü, aneptsü asoshi Naga nunger arok meyong ozüng ka yudi aser iba ozüng tashe ajanga azüokdi ta nükjidong tulu yur inyak tenzük, aser asenok tsüraportemi akangba Sorkar-i yakta makizük aser teimla manguba agi jogo asen tsüraportemi lumitsü tenzük, parnok kangasa timtem olura akia bendanga agütsür-ang tüssü makizükne akizükba lir.

Iba ozüng dangji Naga Sorkar-i (Nagaland Liquor Total Prohibition (NLTP) Act, 1989 and Dry State ta declared acü. Iba sülen nungibo sorkar-i Excise Deptt aser Nagaland Police ajanga mapa terara oda ozüng akaba agi ozüng dak ajemdaker inyak aser jogo ozüng dak amendaker CYE, Student aser watsütemi tesemtesem nung mitba liasü aser ano tajung kaji yimtsüng lmsüsürtemi yi yim süngküm telungi penner maitdaktsütsü süngküm shebang, iba jagi Dry State ta acüba mapa telaka inyakka liasü, Saka techemnertembo odasa meyimma achemba agi dakumbo sümar, kibongtema okronger ta küm 37 liasaa arur, NBCC aser Arogo Mungdangtemia nokdangtsüba mapabo kecha meinyak saka yi agi temang raksar alirtem nüm-ang counselling Impur nung anügo ka ana akiba jagi nisung ka ana ajangzüktsü akok saka Naga yimyim nung mapa meinyak, Nagaland nung aser Ao lima nung nisung kari Rehab lapoker yi aser Drugs achertem anitena anepalutar. NBCC aser ABAM-ia Rehab. ayur nemjia tiyari terabo agütsür magütsür mesüra parnok semdangia aor maor. Alinük aekati missionary-bo aeka yokka yarir bi lima nung bi nüpur yaritsübo shisatsü nung mali cürabang kechi atema tamanger mapa inyaker?.

Yi chetiyongtir aser azümesennertemji senti daküm parnok daküm aser tanela anaprong kümsüktsü asenok nisung shia nüm nungloktsü aser aji Tsüngrem sempet ka asenoki mapa agi inyaktsü nungloktsü ta angatettsüla, asenoki otsü ajanga angazükba agi RIP VAN WINKLE küm medsü (20) mejang ta metetta lir RIP VAN WINKLE ya shidakba nisung macü nisung shirnok azümesen kecha meinyaker, ou dang jempia mejanga dang alir-i tajangzük magütsür nungi angazüktsü (Lesson) tesüngmangtsü otsü kaket ka lir. Iba nisung nungi angazükka zülua ta kuli tejangja asenokia yi nokdangtsü atema kecha meinyak küm 37 mejanga yutsüba kum-ang timba ataloka lir. Anungji RIP VAN WINKLE otsü akumbaji, yamala maparen ajanga otsü yanglur. Naga nungeribo küm 20 dang nungi 37 jiang isheba ama pilemya alitsü sudi. Ajisaka küm medsü (20) mejangba ashe tasübo masü sak asenok Naga nungeribo yi nokdangtsü mapa kecha meinyake küm semmertenet (37) mejanga yutsür. Ano Azü o Ak-na lumungi alu inyaktsü yok saka Ak-iang inyak-ashe Azü-ibo kecha meinyak anügo piyong mejang, teiyaktsü nisungi meinyak meinyakner nüm-ang nükkä yutsü. Aenoki Ak o Azü-na asen kidang anepalua mesüyongjia Ak-bo outside ki palaka yanglur asenoki mechenüba chiyongtsü chibo memerük aser tamajung ka nung metar tzü tazü den meyoktepper chiyongdaktsür, küm ka nungbo sen meyi 40 mesüra 50 agi ayokker iba jagi asen kibong nungdak tulu nung yarir. Saka Azü shebo shidakba tamangeribo machetsüla ta American Missionary temi nokdang aser labo nisung ama bilema asenden külemi asen chiyongba ajak la nüma chedaktsür, sabon tajung special aser shampoo agi tzü chigotsür, asen den melangteppa asayar aser asen den mejanger, takar karibo perfume denna rükloktsür aser tela tanur ama anepalur, Nisung ama-ar Azü she teche ta nokdang nung ajiang techenüba, shidakba AK dang nungibo Azü-iang asenok kanga yaritsüba asenok mitta anüktsübaji la mapa, saka Azüi angobabo nisung asoshi lendong. Labo mejanga dang alir, Asen obula nunger philosopher tekulok tulu adenbayong asenok meimchir daküm aser mapa den medemdanga shesadangtsü otsü ya putu aeka jakdang zülua yutsü. Azü-a asenoki temmokji asenoki anepaluba ama macü kecha mapa nunga meyarir, RIP VAN WINKLE küm medsü (20) tashi kecha meinyak mejang, aser asenok Naga nunger ajaki temulung agüja bendanga inyaktsüba Koba yi mayoktsü mesüra machemtsü nokdangtsüba purtemia kecha meinyak mejanger. Mathi 25 nung sen mori ka akizüksang du ABAM aser NBCC nunger acütsü, mapa kecha meinyak ali nung remma ayu.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Paraguay nung Laishiba meyipsang, Tim Curtis mapa nungi anisüngzükogo



Tim Curtis (ajichilen nungi tasembuba)

April 27, 2026: Paraguay kübok Chaco region nung lisopur oshi nung Laishiba meyiper missionary kati küm 44 tashi ministry mapa aser Lai meyipzükba mapa inyaka aruba sülen anisüngzükogo.

Missionary Tim Curtis ya Church Mission Society (CMS) nung mission partner ka liasü. Pai tesüiba küm jenti Énxet lisopur aser tanga lisopurtem tenzuka arugo.

1799 küm tenzükba CMS ya alima nung mission agencies tejentiba rongnung ka lir aser iba telok yagi tang tashi lokti nung sendokba lisopurtem tenzuka arur.

Missionary Curtis-i Southern Énxet oshi nung Lai meyipzükba aser Laishiba 'audio' yangluba nung tongti

shilem agia liasü.

Curtis ya Chile linük nung missionary kibong ka nung soa intetba sülen pa UK nung azüing. 1980s mapang nung pa Paraguay-i oa liasü.

Chaco nung pa La Herencia project nung mezüing inyak, iba sülen oshi balala nung Laishiba meyipzüksü atema training agia liasü.

Pa South American Missionary Society (tesülen CMS den züklok) nung adenba sülen SIL International den specialist linguistic training agi aser Paraguay-i tanaben meyipa oa Southern Énxet oshi angazük tenzuka liasü.

1990s tetenzüklen pai lisopur Laishiba meyipzükker asem den külemi inyakba den külemi United Bible Societies

asere Paraguayan Bible Society den longjemer inyak.

Curtis leniba nung Southern Énxet oshi nung Tasen Lai meyipzük aser Tasen Laiji 1997 küm adoka liasü. Iba sülen küm 20 jungnüa lir 2016 küm Southern Énxet oshi nung Laishiba rangben renema adoka liasü.

Curtis-i tenzükba wadang nungi anisüngzükba mapang nung CMS Chief executive Andy Roberts-i pa nem tenüngsang tulu agüja, "Tanübo Énxet Khristantemi pei oshi nung Laishiba angatetter, züingteter aser lemsatepteter. Tim Curtis-i tenzükba wadang nungi anisüngzükker, ajisüaka pai toktsüba senmang ya teti alitsü," ta metetdaksü.

United Christian Forum-i Manipur CM dang teyari meshir

April 27, 2026: United Christian Forum (UCF)-i shidi ka ajanga Manipur Chief Minister, Yumnam Khemchand Singh dang rara ajanga kongshiba timtemertem yaritsü atema tangsa telemtetba agia inyakdaksüner, ta mepishio.

UCF North East Region otongdar, Toko Teki-i April 25 nü Arunachal Pradesh yimtiba, Itanagar nungi Manipur Chief Minister dangi temepishiba shidiji yok.

Manipur nung kin balala tsüingda rara ajanga nisung aika taküm samaogo, kiojen aika raksaogo aser kibong aika jenshiogo, ta UCF-i metetdaksü.

Teki-i, "Taküm aika samaogo, ki aika mitsü küma rongdokogo aser kibong aika jenshiogo. Mapang ka nungbo ajak külemi tesünep nung litetba tesem nung tetsübu aser melung melemtep adokogo," ta metetdaksü.

Paisa Chief Minister dang iba rara ajanga kongshiba timtemertem yaritsü atema telemtetba agia inyakdaksüner, ta mepishi.

"Pei chirnurtem atema tetsütem tetsübu nung alir, teintet sensotem-a kümzüka mali aser kibong aikati pei ki

toktsür jenogo. Shidakba agibo tekülem kitem ya jenokba tesem tajungtiba asütsüla, ajisüaka rara nung itemjia raksatsüogo," ta shidi nung shia lir.

Chief Minister leniba nung telemtetba tajung aika agiba atema pai tenüngsang agütsü, ajisüaka itemji atangji mapa küma inyaktsüla, ta ashi.

"Tang ama timtem mapang nung kecha meinyakra ibaji kodanga mamadoktetsü," ta pai metetdaksü.

Mark 12:31 aser Mathi 25:40 nung ajemdaker pai sorkar dang talisa sensakertem dak rangloker teyari mapa inyaktsü metetdaksü.

"Ajak ajungtsü atema tang mapang ya tasü itta temeim mapa inyaktsü mapang lir. Tang agiba telemtetbatem ajanga tarutsü jenjang alantetsü," ta Teki-i metetdaksü.

UCF-i United Naga Council (UNC), Coordinating Committee on Manipur Integrity (COCOMI), aser Kuki Inpi Manipur (KIM) teloktem dang yimjung atema longjemer inyaktsü ayongzük.

Chief Minister dangi züluba kasa shidiji UNC Tir, Ng. Lorho, COCOMI Convenor Y.K. Dhiren aser KIM Tir, Ch Ajang Kongsai nunger nem-a

agütsüogo.

UCF-i item telok ajak dang kin, yimsü mesüra aser maitsü kecha mebendangi ajak ajungtsü atema inyaktsü ayongzük.

"Rara mesüra tesempaji ajak tangatetbatem anema lir, aser ibaji ajanga telemsa dang tali adokdaksütsü aser aneptsü atema putu aika agütsü," ta UCF-i metetdaksü.

Osangbener den jembidang UCF National Coordinator, A.C. Michael-i, "Rara adokba sülen küm asem jungogo, tang tashi nisung meyirjang aika jenshia lir, Tenla kitem aser ki aika mitsü küma rongdokogo aser tanurtem-a tepseter. Tangbo iba ya tüzüing-ozüing dak sendakba tebilemtsü ka masü saka loktiliba tamakok ka lir. Chief Minister tasenbai par sorkar ya pa nem vote agütsürtem atema dang masü saka Manipur nung kin ajak meyong lir ta sayutsüsa inyaktsüla," ta metetdaksü.

2023 küm May ita nung Manipur nung kin balala tsüingda rara tulu adoka liasü, iba sülen joko küm asem ajunger, ajisüaka mapang shia tesem balala nung rara adokba ajanga nüburtemi maneni timtem ajangshir.

ANOGO ABEN TSÜNGREM DEN

Tetsübu Masü Tashi

Kechiyong Tsüngremi asenok nem tetsübu masü, saka ain aser temeim aser tazüokba tanela agütsü.

2 Tim 1:7

Nisung tsübu bilembaji Tsüngrem nungi masü. Tanü tebilemtsü tulu ka alibaji tamanger aikati Tsüngrem dang nungi nisung ang tetsübuba, aser ibaji ajanga Tsüngrem peladaksütsü asoshi tenokdangba arudaksür, kechiyong amajok nung nisung peldaksütsü asoshi merangteper.

Asangur Timoti pa yimya nung pa sasa pa dak temulung melemtetba aser shimang nunga tashi mait taküm liasü. Ibayongji pa taküm nung nisungi kechi ashir mesüra koma bilemtsü ta nisung tsübuba agi sünga liasü. Anungji tenyar Pauli nisung tsübu bilembaji Tsüngrem nungi masü ta ajang-ajanga jembi. Hau, asen jakdang kechi lir aji asenoki memetet aser iba jagi asenok tsübu bilemdaksür. Saka Tsüngremi koma angur yamaji ngudaksütsü asoshi Tanela Temeshi ain tashi asenok nem agütsü. Anungji Tanela Temeshi asenok den ali tashi kecha nunga tsübu alitsü tenüngdaksü maka. Tetsübu yongrak nungi salatsütsü Yisu Khrista aru. Anungji ne taküm nung tetsübu kechisa ali item nung jagi sala-a ain aser temeim aser tazüokba tanela nung tashi anga alitsü asoshi Tsüngrem dang meshiang.

Kibuba Ain aser temeim aser tazüokba tanela nung alitsü kü nem agüjangma. Amen.

UP nung tebur kati Khristan yimsü agizükba agi tebuti mezüingmeshi



Agra, April 27 (Agencies): Uttar Pradesh state kübok Hathras nung police-i arrshi küm 65 tambur ka aser par jabaso tanubosang na apu.

Arrshi küm 65, Shivraj Singh'er jabaso tambusang aser pa kinüngtsü nati Khristan yimsü dangi meyip, ta shia pai par jabaso yimjak nung mezüingmeshi.

Shivraj Singh-isa par jabaso aser par kibongji loktiliba nung sendokang ta takhangba agütsüba den külemi yimjak nung par jabaso aser kinüngtsü na nem tsüingsem agi yangluba azük azükja maaksütsü.

Par jabaso arrshi küm 40 Balram Singh aser pa kinüngtsü Meena Devi (38) na den par jabaso ka Agra nung lia liasü. Tawa par kibong Hathras

district kübok Garaw Garhi yimdaki meyipa arua aliba sülen par kibongi timtem ajuru tenzük.

Balram-i Hindu nunger yimya kar mebeshibaji tebuti reprangteta liasü. Taoba Hombarnü tebuti tena mangatetep adoka raratepba sülen anogo ka lir yimdak senden ka ayongzuka liasü. Balram teno, Tarachand-ia pa dak azük.

Osangbener den jembidang Mursan area circle officer, Yogendra Krishna Narayan-i, "BNSS 170 kübok FIR ka benokba sülen Shivraj aser Tarachand na puogo," ta metetdaksü.

Police-isa panchayat anema-a bushisüingdang tenzükogo, ta paisa metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Yalayimlong

(n) sü atakdang amshiba oset (weaving implement)

* Tetsür ajak ket nung yalayimlong akatsüla.

Yalok

(v) tesangwa odaktsü, tesangwa aru (shine upon)

* Anü adokli kü takdang nung yalok.

OLONG PAITEP # 7487

1		2		3		4		5
			6		7			
8								
					9			
		10						
11								12
				13		14		
15								
16						17		

TIPLIN

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 7486 TELANGZÜBA

TIPLIN :

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüing, 0. Omen,
- 11. Lemta, 13. Ola, 14. Kin.

NAI-A YA METETTER



Tanurtem yariba Polish charity kati 'single livestream fundraiser' nung sen teimtiba bendentetba Guinness World Record ka yangluogo.

Online nung Patwogang ta ajaba Patryk Garkowski ajanga YouTube nung anogo 9 non-stop charity livestream tenzüka liasü aser April 26, 2026 anepdang tashi nung 94 million zloty (€22.2 million) tema bendenteta liasü.

Poland nung cancer agi shirangba tanurtem yariba Cancer Fighters Foundation atema parnokki tenla bendena liasü.

Longding nung Wancho nungeri Kham atsüba sentong agi



Dibrugarh, April 27, 2026

(Agencies): Arunachal Pradesh nung Longding district kübok Pumao nung Wancho lisopurtemi Kham (Log Drum) Pulling Ceremony-cum-Installation Programme agiogo. Wancho lisopur meyirjang aika Angh'er kidang adenshir iba sentong nung shilem agia liasü. Iba sentong nung Pumao, Longkhaw, Chatting, aser

Maihua yimtsüing pezü nungi nübortem aden.

Iba sentong nung tongti tesemdangerji Gabriel D. Wangsu liasü, Ranphoa Ngowa-i tetushi süa jaoker aser Thangwang Wangham-i alakteta jaoker ama shilem agi. Wancho nunger asoshi Kham (log drum) dak sobaliba tulu keta lir. Parnoki Kham Pai Tsai ken tena Kham atsüba

sentong tenzüker.

Kham ya tasazük balala lir aser karbo lendenlen metre 12 aser metonglen metre 3 shi asür. Kham ya tekolak, temang aser tepen mesüka chiteter.

Iba sentong nung Pumao tsürtemi tsüingsang ka ia sayu aser Nahphua Wangpan o par teloki Echoes of Ancestral Beginnings ta ser sobaliba jilushi ka ai.

Arunachal nung district 19 malaria-free kümogo

Guwahati, April 27, 2026

(Agencies): Arunachal Pradesh sorkari district 27 nungi 19 tashi malaria-free ta sangoktsüogo aser iba ya 2027 tashi nung malaria samatsütsü alizüing nung mera tulu ka agiba lir.

Department of Health Services kübok National Centre for Vector Borne Diseases Control (NCVBDC)-i Naharlagun nung World Malaria Day amungdang iba osang metetdaksüogo.

"Arunachal Pradesh nung malaria elimination drive maparen inyakba nung iba ya tongti alizüing ka lir" ta Deputy Director of Health Services-cum-State Programme Officer (NCVBDC) K.T. Mulung-i ashi.

Iba mapa ya awareness campaigns agiba, surveillance systems akangshiba aser mapang shitak nung diagnosis &

treatment ajanga inyaktetba lir ta pai ashi.

2025 küm Arunachal Pradesh nung malaria aketer 32 dang puteta liasü ta Mulung-isa shisem.

Arunachal Pradesh nung malaria-free district temji-Anjaw, Dibang Valley, East Kameng, East Siang, Kamle, Kra Daadi, Kurung Kumey, Leparada, Longding, Lower Dibang Valley, Lower Siang, Lower Subansiri, Namsai, Pakke Kessang, Siang, Tawang, Upper Subansiri, West Kameng aser West Siang lir.

Iba sentong nung shilem agirtemi malaria pledge agi aser slogan session ka nung parnokki malaria noktangtsü, putettsü aser anepalutsü nangzükshio.

Külen, Arunachal Pradesh Chief Minister Pema Khandu-ia iba alizüing atongba atema

tenüingsang agütsüba den state nungi malaria samatsütsü nenshia metetdaksüogo.

"Arunachal Pradesh-i 2022 küm high disease-burden state nungi Category I (low burden) jenjangi alutsüsa inyaktetba atema kanga nüma tanga osang lemsateper. Tanü district 19-i malaria-free jenjang tongtetogo aser iba ajanga ozü health workers aser loktitemi bendanga agüja inyakba sayur" ta CM Khandu-i ashi.

"Kümshia National Centre for Vector Borne Diseases Control (NCVBDC), Arunachal Pradesh-i alima den külemi World Malaria Day amungba atema kanga pelar. Iba anogomung ajanga asenoki malaria agientsü külem tenangzükba nenshir" ta Pema Khandu-isa metetdaksüogo.



Nagaland University

(A Central University established by the act of Parliament, 35/1989)

Department of Teacher Education
Kohima Campus, Meriema, Kohima-797004, Nagaland

**NOTIFICATION FOR B.Ed. ADMISSION IN NAGALAND-2026
CET B.Ed. (Nagaland)-2026**

Online applications are invited from the eligible candidates for admission to B.Ed. regular course of two years for the academic session 2026-28 in various government and private colleges of teacher education across Nagaland State. All the candidates who meet the eligibility criteria for this course can apply online from 27-04-2026 onwards. For more information visit the website of Nagaland University;

(<http://nagalanduniversity.ac.in/English/>) or (<https://admission.nagalanduniversity.ac.in/>)

Date of Commencement of Filing Online Application Forms	27-04-2026
Last Date for Submission of Application Forms	25-05-2026
Date (Time) of Entrance Test	11-07-2026 (11:00am to 13.00 pm)

CONVENER
CET B.Ed. (Nagaland) -2026

Iran-i Strait of Hormuz lapoktsü mulunger, US dang mokdangba anentsü ashir

Cairo, Rongchii/April 27 (Agencies): Iran-i par nuclear sentong indang mejemie Strait of Hormuz shibanga aliba lapoktsü mulunger, ta ketdangsür anati Hombarnü ashi, aser iba linük indang foreign minister-i Israel aser United States den raraba dak sendakba nung Moscow den shisa agiteptsü atema pai Russia semdang.

Iran-i US dang par linük mokdanga aliba tatem kati arudaktsüner, ta ketdangsür anati tenüng memetetdaktünüü ashi.

Proposal tasenba ya Pakistan-i United States nem agütsü, saka US Tir Donald Trump-i memulungsü amai lir, shibai Strait of Hormuz tanaben lapoka teti asoshi ceasefire alitsü atema tezüngzüktep nung Iran indang atomic program ya tatem kati arudaktsüner.

"Asen jenjang tajungba lir. Parnoki jembinüra, parnoki asenok bushia arutsü akok mesüra parnoki asenok dang call sütettsü," ta Trump-i Deobarnü Fox News Channel dang ashi.

Iran indang proposal ya Axios news outlet nung mezüng sangdonga liasü.

Iran sorkar meyong IRNA

news agency ajanga ashiba agi, Russia Tir Vladimir Putin den senden ka amentsü lia Foreign Minister Abbas Araghchi Hombarnep St. Petersburg tongogo. Pa hopta tatemlen ainlen jajaba mapang Pakistan nung anaben anen aser Oman semdang. Strait of Hormuz ya Oman aser Iran külemi amshir.

Ceasefire liaka tongtipang Strait of Hormuz mechi Iran aser US tsünga atsütepa aliba mapang Araghchi-i Russia semdang.

"Rara dak sendakba nung tang tashi ataloka aliba indang ozü Russian tembar den shisa agiteptsü ozü asoshi maongka tajung lir," ta Araghchi-i video

interview ka nung ashiba IRNA-i prokshia liasü.

Iran aser US tsünga jembishinü anendaka aliba Pakistan-i asendenshitsu meranger, aser hopta tatemlen Islamabad nung jembishinü akatsü imlar. Saka US Tir Donald Trump-i phone ajanga ang jembishinü ya akatsü ama ashir.

America nunger yimya ajanga jembishinü menudaktsür, ta Araghchi-i ashi.

"Taoba jembishinü nung terenlok liaka Washington-i alakya akhangba ajanga nükjidong metongtet," ta pai ashi.

(Maneni tapak 8 nung...)

MENUNGRA BILEMTETER

Sür küm ka (1) ajungba
Lt. Mrs. Yashitsungla Aier (Süngratsü)
28.04.2025 - 28.04.2026

Kodanga amatsü makokba temeim Oja, tanü na sür küm ka (1) renteta arur, saka nü temeim shisatsü, ajemalu, taremzük aser nü mapa tajungtem onok mulung nung teti alir aser nükla arur. Tanü na asüba anogo nung onoki na kanga menungra sarasadema amonger.

~ Temeim Kinungbo, Jala, Jabaso, Semchirtem aser Kinungertem.



Office of the Unger Students' Union

Mokokchung Unit

KHONANG TETUSHI AGÜTSÜR

Kr. Imnayangla,
D/o Wb. Takotemjen & Wt. Chubaangla (Khar), 2026 HSLC tatidang nung Top 8 jenjang, St. Mary Residential School, Alichen nungi takok ngutetba asoshi Unger Students' Union Mokokchung Unit office ajanga tepela lemsateper aser Tsüngrem tenüng sanga takoker nem tetushi tulu agütsür.

Tarutsü nung ne shisaluyimba lenmang ajak nung Tsüngremi maneni moajangma.



Sd/-
Imlimongla
President

Sd/-
Rongsenienla Jamir
General Secretary

Jamir Kidong Mokokchung Village

Mokokchung, Nagaland

TENÜNGSANG ASER TEUSHI AGÜTSÜR

2025-2026 NBSE kübok HSLC tatidang agiba nung A. Bendangtoshi Jamir aser Watimongla Imchen na jala **Kr. Lipoklemla Jamir**, lai top 19 jenjang nguteta kin sanger nem khonang nüngsang tulu bener arutsü nung la nem tenüngsang tulu agütsür aser tsürabur danga kanga pelaba lemsateper.

Tsüngremi tarutsü anogotem nunga takok aser temoatsü taküm sädakjangma.

Kidong tenüng nung;

1. R. Kilen Jamir (Tatar)
2. Longritemjen Jamir
3. L. Ngangshi Jamir
4. Tiatemsü Jamir



OFFICE OF THE

TAMAJANGTSÜR TELUNGJEM CHANGTONGYA TOWN

P.O. Changtongya -798613, Nagaland

TENÜNGSANG ASER TETUSHI AGÜTSÜR

Kongro Akümtula Jamir, D/o. Temjenjungba Jamir, NBSE küpok HSLC 2025-26 tatidang nung Top 20 jenjang nguteta khonang tetushi tulu bener arutsü nung asen lartemi tenüngsang ola aser tepela tulu lemsateper.

Ajak takoksang Tsüngremi ne tazungba wadang nung tali ajungketa moajangma.

Sd/-
N. Amongla
President

Sd/-
Tiala Imkong
General Secretary

OFFICE OF THE

KHAR VILLAGE COUNCIL

P.O MANGKOLEMBA B.P.O KHAR
MOKOKCHUNG : NAGALAND

TENÜNGSANG ASER TETUSHI AGÜTSÜR

Khar Council ajanga **Miss. Benjungsena**, D/o Mr. Moakaba & Mrs. Chubamongla, NBSE kübok HSLC 2026 tatidang nung Top 19, subject topper (Tourism & Hospitality, Vocational) nguteta senso sanger nem konang tetushi tulu bener arutsü nung kanga pelaba lemsateper.

Ano iba den Govt. High School Khar nungi aser bendanglen nungi kwi kati taküm NBSE kübok HSLC & HSSLC tatidang nung takok tajung nguogo nenok ajak dang pelaba lemsateper. Ano tarutsü nung nenok nükla tajung yur shisaluyimba nung Khar nunger tenüng nung takok konang tetushi bener arutsü sarasadema yimla atar.

Tsüngrem-i nenok ajak tazungba wadang nung ajungketa moajangma.

Sd/-
Limatoshi
Chairman,
Khar Village Council

Sd/-
Tareptsungba
Secretary,
Khar Village Council



OFFICE OF THE

LANGPANGKONG KAKETSHIR MUNGDANG

Langpangkong Students' Conference

TAKOK TENÜNGSANG YIMYIM

Molu lisem ama tazünger nütsüng nangshia alirtem rongnungi, shisang shisanga nokdaktettsüsa meranga azünga nung Teyanglur temoatsü amsü kaodak atongsemer Langpangkong Kaketshir takotet trok (6) shimokisa tawa sangdongba Nagaland Board of Education (NBSE) kübok High School Leaving Certificate (HSLC) aser Higher Secondary School Leaving Certificate (HSSLC), 2026 tatidang nung takok tulu ngutetogo nenok ajak nem Langpangkong Kaketshir Mungdang (LKM) mendenti ajanga tenüngsang aser aküm tulu agütsür.



HSSLC (Science)

Name: Mr. Benjungakum Jamir
Rank: Top 9 (b) (91.60%)
F/N: Mr. Meyidangit
Village: Merangkong
School: Holy Cross Higher Secondary School, Dimapur



HSLC

Name: Miss Imnayangla
Rank: TOP 8 (b) (96.67%)
F/N: Mr. Takotemjen Ao
Village: Unger
School: St. Mary's Residential School, Alichen



HSLC

Name: Miss Imliyangerla
Rank: TOP 13 (d) (95.83%)
F/N: Mr. Moatoshi Longkumer
Village: Changtongya
School: Little Star Higher Secondar School, Dimapur



HSLC

Name: Miss Tiatola Ao
Rank: TOP 20 (b) (94.83%)
F/N: Mr. Obangyanger Ao
Village: Mongsenyimti
School: St. Mary's Higher Secondary School, Padampukhuri



HSLC

Name: Miss Akumtola Jamir
Rank: TOP 20 (b) (94.83%)
F/N: Mr. Temjenjungba Jamir
Village: Changtongya
School: Christian Standard Higher Secondary School, Changtongya town



HSLC

Name: Mr. Shilunungtet
Rank: TOP 13 (d) (95.83%)
F/N: Mr. Purmatsung
Village: Mongsenyimti
School: Subong Govt. High School, Mongsenyimti

Iba den külemi Langpangkongsanger kaketshirtem shirnokisa 2026 NBSE kübok HSLC aser HSSLC tatidangtem nung takok tajung nguogo, nenok ajak nem LKM mendenti ajanga takok tepela tenüngsang agütsür. Ajioda, merandangaka tamakok ngur alir kaketshirtema temulung ajema melii tarutsü asoshi majang yangshir inyaktsü ajungshir.

Tsüngrem akümtsüba maneni meranga inyakba ajanga taküm nükjidong tongteta asemtetba kaketshir tajung kaka asütsü asen LKM mangdang aser sarasadem.

Sd/-
Tzuwasanen
President

Sd/-
Imtichingmak Chang
Education & Statistics Secretary

PV Sindhu BWF Council nung denogo



Rongchii/April 27, 2026 (Agencies): PV Sindhu Badminton World Federation (BWF) Council nung dena pa voting züngsem ka kumogo. Formal vetting inyakyim tembangba sülen la BWF Council nung denogo.

La shimba ya 2025 kum tatemlen rene aser la Horsens nung mezüngbuba BWF Annual General Meeting nung shilem agia liasü.

BWF Council ya alima ajunga nung badminton asaya achaayangba lokti tentet lir. Voting züngsem ka ama Sindhu ya iba asaya tarutsü atema tongtibang telemtetba agiba nung indang indanga shilem agitsü.

La shimba ya balaka lir, kechiyong la ama tasayadak

aliba asayar ka iba amala yimsüsüba nung tongtibang shilem agiba mangutsü.

Küm ishika tsüngda Sindhu ya badminton asaya nung takok tajung anguba asayar ka dang masü saka la ya ajaki akümtsübuba iba asaya global ambassador ka kumogo.

Pa Council nung züngoksema ajanga la lenistüba aser lai iba asaya kanga junga angatetba dak tamang akümba sayur.

"Badminton World Federation nung iba shilem agia alima ajunga nung asayartem tenüng nung nokdaksü maongka anguba ya tetushi tulu lir," ta Sindhu-i ashi.

"Badminton asayai kü nem aika agütsüogo aser iba asaya nem meyipa agütsütsü asoshi

iba maongka anguba atema kanga pelar.

"Ni mejeta BWF tir Khunying Patama Leeswadtrakul dang la tajungshiba asoshi kanga pelar aser Council aser BWF lokti den inyaksü yongyaseta atar," ta lai ashi.

BWF tir Khunying Patama Leeswadtrakul-i Sindhu shimba ya pelashishia agizükogo, aser yimsüsüba nung asayartemi shilem agitsü koda tongtibang iba indang lemsatepa liasü.

Sindhu-i iba shilem agiba ajanga asayar aser administrator tem tsüngda tesendaktep akangshitsü aser temaba jenjang nung toktepertem dak apet telemtetba agitsü aser iba asaya tarutsü tajungba kuma yangshitsü imlar.

Thomas Cup: India-i 5-0 agi Australia kokogo

Rongchii/April 27, 2026 (Agencies): Hombarnü Horsens nung Australia 5-0 agi akokba sülen India team Thomas Cup Finals quarterfinals-i iogo.

Group A nung India aser China na temaba jenjang nung lir. 2022 champions yagi mezüngbuba asaya nung 4-1 agi Canada kokogo aser China-i Australia 5-0 aser Hombarnü Canada 4-1 agi koka liasü.

Team ana ya iba telok nungi temaba jenjang asoshi Bodhbarnü asayatsü.

Hombarnü mezüngbuba kija asaya nung Paris Olympian aser Commonwealth Games champion Lakshya Sen-i 21-14, 21-16 agi Ephraim Stephen Sam koka India team temaba jenjang nung toktsü.

US Open champion Ayush Shetty, shiba Badminton Asia Championships nung tanabuba

jenjang nung tembangba liasü, pai 21-8, 21-6 agi Shrey Dhand koka parnok 2-0 agi timba aküm.

Iba sülen tarep asaya nungi India nunger rongnungi temaba jenjang nung aliba tarep Satwiksairaj Rankireddy aser Chirag Shetty nati 21-14, 21-16 agi Rizky Hidayat aser Jack Yu na koka 3-0 aküm.

2023 World Championships aser Asian Games bronze medallist HS Prannoy-i tasembuba kija asaya ya 21-11, 21-17 agi Rishi Honda Boopathy madak takok ngua liasü.

Tanabuba tarep asaya ya Hariharan Amsakarunan aser M.R. Arjun na asaya aser tena Andika Ramadiansyah aser Ephraim Stephen Sam 21-12, 21-10 na ayong ayonga koka, India-i iba asaya match ka nung danga tamakok mongui kokogo.

Spurs nungi asayar Xavi Simons season tepeyong masayatetsü



Rongchii/April 27, 2026 (Agencies): Tottenham pur relegation zone nung maneni timtema aliba mapang tia maka parnok rongnungi Dutch nunger midfielder Xavi Simons yirua pa season nung tanungba asayatem nung masayatetsüsa kumogo.

Pa temekok yirur masayatetsüsa akümba ajanga parnok relegate masütsü atema meranga asayaba mapang tetsükdaksü tulu adokogo.

Simons ya Tottenham puri Honibarnü goal 1-0 agi Wolves pur akokba asaya nung anterior cruciate ligament (ACL) yirua liasü. Iba asaya akokba ya par team asoshi league asaya 16buba nung mezüngbuba asaya akokba liasü.

Molineux nung asayaba mapang minute 63buba nung ball arishiba mapang arishi kum 23 tain asayar ya temekok beleba yirua liasü.

Pa yiruba ajanga club nungi masayateti akümba dang masü saka pa taruba FIFA World Cup

nung Netherlands tenüng nungi masayatetsü.

Yiruba sülen mapang tatsüka lir Simons-i social media ajanga osang ka lemsatepa liasü.

"Kü season tembangogo aser ni iba ya agizüktetsü merangdar. Ni kanga temulung raksar. Ni team atema teti junga asayaner saka tang iba ya World Cup den külemi kü ket nungi bener oa tokogo," ta pai ashi

Tottenham pur Premier League nungi metugutsü atema meranga asayaba mapang midfield nung Simons nem tongtibang shilem agidaksütsü atema Spurs manager tasenba Roberto De Zerbi bilema liasü asütsü.

Wolves pur kokaka Tottenham pur table nung tang 18buba nung lir aser parnok West Ham United dang nungi point ana agi ishiba lir.

Asaya pezü asayatsü anunga lia parnok abelen tilaka danga menatsü asoshi lenmang makai kumogo.

BENDANGLI OSANG :

Tapak 7 nungi...

Iran-i Strait of Hormuz lapoktsü mulunger, US...

Trump-i tang Iran nung shiba 'in charge' lir ta asüngdang aser par theocracy nung mangmangtepba ajanga tezüngzüktep yanglutsü asaker, ta shia liasü.

Ita tetenzüklen otsü yanglua tejak o tejak jitepa jembishinü akaba indang 'follow up' ama envoys Steve Witkoff aser Jared Kushner na Islamabad-i yoktsü ta White House-i taoba ita shia liasü. Saka Araghchi ya Honibarnü Pakistan yimtiba yutsür ao aser mapang tatsüka lir Trump-ia Iran den terenlok maliba mechi iba mission agiener ta shia liasü.

Araghchi mapang tatsüka lir Islamabad-i meyipa shilang aser Oman yimtiba Muscat semdang aser Russia-i ao. Pai Deobarnü phone ajanga Qatar aser Saudi Arabia foreign ministers tem den jembia liasü.

Strait of Hormuz nung mangatettep lir, kechiaser Iran-i iba tzü lenmang ajanga rong senzütsü memelar aser

US-i Iran nunger rongnendak mokdanga lir. Persian Gulf nung iba tzü lenmang ya ajanga alima nung totzü aser natural gas shilem pongi shi abener.

US aser Iran tsüngta ceasefire alitsü April 7 nü mulungtema aliba ya taoba hopta Trump-i mapang telatet makai atsülangtsü, koba ajanga US aser Israel nati February 28 nü Iran maka tenzüikba rara tuluba soita lir. Ajisüaka nisung meyirijang aika tepseta alima rongsenketzüng anokshitsüba rara teti asoshi tembangtsü teimla kanga ajema lir.

US aser Iran na maneni amokmerenteper. Honibarnü Iran indang joint military command ajanga, "US-i naval blockades, banditry aser piracy densema mitkar temi tashiyim mapa inyakba manenra, yangji telangzüba teashi agütsütsü," ta shia liasü.

Taoba hopta Trump-i par mitkar dang iba tzü lenmang nung mines yutsütetba rong tilatem dak akhatsü aser tepsettsü totuyuba agüja lir.

Witkoff aser Kushner na Islamabad-i aotsü aliba thitsür minute ter tsüngta Iran-i kanga agi tajungba proposal ka yok, ta Trump-i Honibarnü osangbener tem dang shia liasü.

Pai rasaa mashi saka pa indang condition kaji Iran ya nuclear nok-nü malitsüla ta ashi. Iran indang enriched uranium ya mapang talangka nungi mangatettep tiyong sür arur. Tehran ket nung 60% enriched uranium tuozük seret 440 lir, koba weapons-grade levels akumtsü mera ka dang lir, ta UN nuclear watchdog agency ajanga ashir.

Rara tenzüker Israel nung nisung 3,375 tepsetogo aser Lebanon nung nisung 2,509 shi tepsetogo. Isral nung nisung 23 tepsetogo aser Gulf Arab linüktem nung ter dak tema süogo. Lebanon nung Israel sepai 15 tepsetogo, region nung US service members 13 aser southern Lebanon nung UN peacekeepers trok tepsetogo.

BILEMDANGANG

"Temaotsü lemsatepba agi tali temaotsü angur."